

欲一奉晨昏他非所計也遂以蒲考乞歸省是後長
垣之士舉于鄉者相踵而先生已去官矣居無何以
例謫司山陽魚課先生不以爲憚爲之立條約去濫
費緩納期數載而逃亡者來歸歲課無逋郡守彭某
楊某咸器重之薦其才可大用而學士李公時勉與
侍郎叔縉亦推譽焉皆以資淺格不行內相楊文貞
公每見淮郡守貳必問先生動靜尚書周文襄公忱
往來于淮躬至官舍存問且將舉而用之先生適以
母喪去官而諸公亦相繼淪謝遂不果用服闋改湖
廣張家湓湖官其上下交譽如在山陽時有以公勸

廉幹宜任民牧薦之者亦不報秩滿陞福建將樂千
戶所幕官戎務修舉武弁與諸卒伍咸宜之居三載
遂以疾致其事而歸時景端適以易魁薦于鄉先生
喜曰吾事畢矣乃作壽藏于所居之西桃塢爲屋數
楹扁曰裕庵鑿月池蒔花木日課子孫讀書其間將
終身焉景端舉進士輒不利若何蕃然大懼先生老
矣而祿養未逮乃俛就江浦教官先生亦欣然就養
日與邦之耆舊往還觴咏酡顏鶴髮後十餘歲景端
文行甚修而先生神氣豐腴人以爲有仙道焉如是
者五七年既而還鄉遭長孫翀與其弟某之喪情思